

Q. D. B. V.

OBSERVATIONES ET MEDITATIONES

QVAEDAM
PRACTICO - ANATOMICAE
CIRCA

OPVS
GENERATIONIS
IN FOEMINIS
IN DISSERTATIONE PVBLICA

RECTORE MAGNIFICENTISSIMO
SERENISSIMO PRINCIPE AC DOMINO
D O M I N O

GVILIELMO HENRICO

DVCE SAXONIAE IVLIACI CLIVIAE MONTIVM
ANGARIAE VVESTPHALIAE ET RELIQUA

PRAESIDE

SIMONE PAVLO HILSCHERO

DOCTORE MEDICO ET PRACTICO IENENSI
FAVTORE ET PRAECEPTORE SVO VENERANDO

PVBLCO PHILIATRORVM EXAMINI

SVBMITTVNTVR

AD DIEM FEBRVARIi ANNO *clō lō ccxix.*

A RESPONDENTE

HERCVLE DAVIDE HENNENHOFERO

VLMENSI.

JENAE, LITTERIS HELLERIANIS.

2740

IN THE

CHIEF OF POLICE

REPORT

OF THE



OBSERVATIONES ET MEDITATIONES

QVAEDAM

PRACTICO - ANATOMICAE

CIRCA

OPVS GENERATIONIS
IN FOEMINIS.

§. I.



Nullum in tota œconomia animali negotium multis adhuc difficultatibus, dubiisque involutum est, erit sane negotium generationis è parte maxime foeminarum, sive conceptionem, sive formationem nutritionemque foetus, sive denique ipsum partum, & quæ ad harum actionum signa, variaque phænomena attinent, spectes. Operam igitur nostram non male collocaturos nos esse confidimus, si observationes & meditationes quasdam, quas nobis circa generationis in foeminis negotium tum praxis medica, tum dissectio partium genitalium foemellarum, tam in hominibus, quam brutis, ipsorum-

que foetuum apertio cultro anatomico peperit, cum in finem proponamus, ut vel hucusque nota magis confirmantur, nova quaedam examinentur, vel quoque addantur, aliorumque placido examini tradantur.

§. II. Convertit autem primo loco ad se meditationes nostras *cognitio gravidatis*. Quam ardua enim hæc in foro medico res sit, vel ex eo patet, quod non solum medicorum, sed & parentum atque familiæ, imo interdum ipsius reipublicæ, intersit, tempestive ac certo scire, an foemina utero gerat, nec ne? quo hujus spes omni modo defendi queat. Accurata hujus momenti pensatio sanitatis morborumque artifices impulit, ut de signis graviditatis in scholis suis maxime essent solliciti, eademque ad normam diagnoseos, tum sanitatis, tum morborum, è consuetis signorum fontibus, essentialiter nempe inhærentibus, essentialiter consequentibus, causis, & similitudine desumerent. Ad essentialiter quasi inhærentium classem merito retulerunt 1.) mensium emanationem in sanis, justæque ætatis foeminis, 2.) incrementum abdominis debitum, atque 3.) motum ipsius foetus. Quæ tria vero hæc signa certo ordine se invicem consequi debent, sibi que proportionatim respondere, ac relationem ad se invicem habere, peregrine ita judicante *Illustri & venerabili Academia nostra Seniore WEDELIO, in dissertatione de notis gravidarum*. Licet enim, quod mensium emanationem attinet, eadem non semper conceptionem factam sequatur, dum scilicet quandoque primis mensibus fluxus hic, pariori quamvis quantitate, continuat, & interdum ad tempus usque gestationis medium: interdum etiam per aliquot mensium spatium desinit, & de novo conspiciendum se sistit, salvo nihilominus manente foetu, testantibus id observationibus. Ejusmodi tamen casus extraordinarii sunt, & per consequens regulam ordinariam: quod

quod mensium emanatio in ianuis, & convetudine viri, bene se habentis, utentibus foeminis, graviditatis sit index, minus invertunt. Ad signa vero essentialiter consequentia spectant ea, quæ vel menses retentos, & inde immutatam Mam Seam, quoad quantitatem, qualitatem, & motum, vel ipsum incrementum abdominis, & in hoc latentis uteri excipiunt, & ab iisdem dependent. Ut itaque historia & ordo signorum graviditatis, tam essentialium, quam essentialiter consequentium, & reliquorum, secum invicem sociatorum, sequenti potissimum ratione vulgo tradatur.

§. III. Foemina corpore vegeto iustaque ætate pollens post coitum cum mare, ad generandum habili, præter morem delectantem, eodem die, & sequente, uno alteroque horrore, nec non dolore tolerabili, circa lumbos, & in hypogastrio, corripitur, postea accedunt nausea ciborum, imprimis carniū, coctarum assatarumque, vomitiones, *δυσ-αγέσσωσις*, atque morositas quædam, quandoque adversus ipsum maritum, venerem concupiscentem, anxietates tum à cibo, quousque rejiciatur rursus, tum à vestitu arctiori, & aliàs; quandoque caligines oculorum, & imminens lipothymia, tributi lunaris emanatio, mutatio coloris faciei, & ephelidum, s. macularum in eadem eruptio, jam suo tempore *optimo artis nostræ parenti HIPPOCRATI* cognitæ, *teste libr. de sterilitate c. 6. text. 9.* dentium dolor non raro. Mense altero tertioque tumor ventris observatur circa regionem hypogastricam, & umbilicum, qui sensim etiam versus lumbos exporrigitur, occurritque non raro in mollioris animi, minusque firmati iudicii foeminis, appetitus incongruorum, ratione temporis & quantitatis imprimis. Medio mensis quinti fit perceptio motus foetus debilis, micantis, & quasi pulli gallinæ, grana colligentis, hinc fortioris & subsultantis, qui ultimis mensibus volutanti similis fit, ut modo ulna, modo genu, modo caput

ventri non admodum obeso admota manu tangi queant. Interea mammæ cum tensione quadam factæ sunt turgidulæ, arri-
guntur gliscuntq; papillæ, & compressæ lacteum quid fundunt,
fiuntque admodum sæpe varices in pedibus, h. e. nodi &
crispaturæ venarum, unde Germanis *Rindes = Adern* di-
cuntur.

§. IV. Perbene vero doctis prudentibusque medicis no-
tum est, quod cuncta jam recensita è conceptione gravidita-
tis signa raro in uno eodemque subjecto accurate spectentur;
quin sæpe numero in robustioribus paucissima è consequen-
tibus adsint, aut minus æstimentur: in valetudinariis autem
cum hystericis, hypochondriacisque symptomatibus ita com-
plicentur, ut sæpe primiparas non solum foëminas, sed & has,
quæ jam aliquoties peperere, ad quintum mensem, & perce-
ptionem motus foetus manifesti suspensas teneant, uti iisdem
fere verbis exposuit *Magnificus atque celeberrimus SLEVOG-
TIVS differt. de partus naturalis cum præternaturali collatio-
ne §. 12.*

§. V. Quam vere & sapienter hæc ipsa à Viro laudatis-
simo sint pronunciata, quotidiana praxis satis superque testa-

Quot enim quæso dantur foëminæ, quæ adeo sagaces,
teneræque & sensibilis texturæ sunt, ut leviculum istum hypo-
gastrii lumborumque dolorem, vel etiam horrorem, semel
vel bis primis diebus invadentem, percipiant, aut adeo ad eun-
dem attendant, ut accurate vel maritos, vel medicos de his
phanomenis certiores reddere queant? Neque perceptio de-
lectationis, præter morem in coitu insignis, admodum proba-
bile conceptionis fientis signum præbet: cum quædam foë-
minæ sæpius tali oblectatione in coitu fruuntur, neque
tamen concipiant: aliæ vero vel nulla, vel levi, inter
mariti amplexus afficiantur, singulis tamen annis utero gerant,
sicuti

sicuti CORNELIVS SOLINGEN, *Tract. de officio obstetricum cap. 1. p. m. 590.* recenser, se novisse foeminas, quæ ingenuæ sibi sint confessæ, se nunquam in coitu voluptate per-
fusas fuisse, nihilominus tamen quotannis concepisse.

§. VI. Cum igitur initium graviditatis prime mense accurate & certo dignoscere, ardua res sit, eo magis ad omnia phænomena in subjectis foemineis, de quibus conceptionis aliqua suspicio est, attendendum censemus. Observavimus vero duodecim abhinc annis in aliquot, quæ concepere, foeminis *frequentiorem solito ad urinam reddendam stimulum*, & in quibusdam sibi satis notabiliter molestum, quem ideo nobis, vel coram, vel per maritos, exposuere. Pensitavimus hoc phænomenon, & subsequenter annis pluribus vicibus annotavimus, explorantes id ipsum è maritis vel foeminis ipsis, sicut fuit occasio. Dumque scriptionem hanc hucusque meditati sumus, idem nobis testatæ sunt plures personæ. In specie vero civis hic loci honestus nos certiores fecit, quod uxor sua, sex liberorum mater, semper circa imprægnationis initia ad trium hebdomadum spatium frequentius solito urinam reddere opus habuerit. Idem paucis abhinc diebus confessa nobis est honestatis pariter laude conspicua foemina, quæ jam duplici prole maritum exhilaravit, & in præsentī tertia vice duas circiter hebdomadas se gravidam esse è duobus hisce phænomenis judicat: quod appetitus carniū fere nullus, sed saltem panis butyro illiti, stimulusque frequentior paulo ad emittendam urinam, quam præcedentibus hebdomadis, adsint. Solet hæc frequentior ad vesicam exonerandam irritatio primis tribus vel quatuor graviditatis hebdomadis potissimum observari, in aliis levior, in aliis vero fortior; postea vero sensim eadem evanescit, uti quidem nobis annotare licuit.

§. VII. Proponimus hocce circa praxin nobis enatum, & novum fere visum, graviditatis inchoatæ signum, eum potissimum in finem, ut medici ac mariti ad idem impoſterum attendere dignentur, ſique idipſum univerſale deprehenderint, inter conceptionis factæ ſigna referre velint. Veriſimile enim videtur, phænomenon hoc in omnibus fœminis paucis poſt conceptionem diebus ſe exerere, licet hætenus a paucis forſan medicis fuerit annotatum. Dantur enim ſæpe in rebus tam phyſicis quam mædicis obvia phænomena, & quotidiana, quorum tamen quandoque non conveniens fit annotatio, vel attentio.

§. VIII. Eſt porro ſignum allegatum tale, quod ſtatum uteri, poſt conceptionem immutatum, prompte conſequitur, atque è principiis Phyſiologicis & Anatomicis lubentiſſime fluit. Neminem enim vel leviter in Anatomia verſatum fugit, quod pars uteri anterior ſuperne cum veſica cohæreat, & quod ſphincter veſicæ orificio uteri interno fere ſit ſuperpoſitus, quamvis hoc nonnihil retrorſum inclinet. Dum igitur à fœcundo liquoris maſculi contagio, ſeu ſpiritu, hætenus compacta ſatisque firma uteri ſubſtantia rareſcit, ejusdemque cavitas pro recipiendo novo amicoque hōſpite expanditur, aliter fieri non poteſt, quin, propter arctam cervicis matricis cum urinaria lagenula per fibras membranaceas connexionem, vaſculum hocce ad ſui corporis contractionem ſubinde, & frequentius ſolito, ſollicitetur, & , per conſequens, frequentior ad mingendum ſtimulus adſit, quam iisdem non fœtis. Ceſſat autem poſt lapſum duarum, trium, quatuorve hebdomadum frequentior hæc ad mingendum irritatio, quia proſectiori graviditatis tempore uterus magis quoad partem mediam, ſive corpus, atque fundum, verſus ilia, regionem hypogaſtricam & umbilicalem expanditur, unde ſtimulus veſicæ ſphincteris

cteris deficit, mole uteri in altiorē locum se recipiente ; vel si forsan aliqualis lenisque remaneat, natura istius assveta eundem perferre discit.

§. IX. Facile vero patet hucusque expositum frequentiore ad mingendum stimulum, primo mense in gravidis contingentem, utique differre ab ista vehementi ad urinam reddendam irritatione in iisdem, quando foetus longius paulo tempus partus medium transgressus, uno verbo partui proximior, aliquando ita importune vehementerque in suo ergastulo commovet artus, ut hi versus vesicam cum impetu propulsi eandem comprimant, & contra matris voluntatem liquorem obsoenum ē matula microcosmica expellant ; vel ipse uterus, quietus licet, in quibusdam foeminis mole sua, magis deorsum vergente, vesicam angustiorē reddat, adeoque frequentiori urinæ excretioni occasionem præbeat.

§. X. Aliquod observationis vestigium, cum nostris experimentis quodammodo conveniens, legimus apud ANTONIVM MOLINETTVM *Dissertat. Anatomico-Patholog. L. VI. c. 7. p. m. 304.* ubi adserit, quod foetantes mulieres, iisdem ipsis non prægnantibus non solum sæpius, sed multo etiam copiosius mingant. Ast ingenue fatemur, commemoratum à nobis ad frequentius mingendum stimulum primis tribus, vel quatuor saltem graviditatis hebdomadis, observatum fuisse, postea vero evanuisse. Neque etiam cum laudato Italo audemus pro certo adstruere molem urinæ excretæ in gravidis longe copiosiorē esse, quam iisdem non foetis : cum nondum evictum sit, foeminas utero gerentes majorem potentiorum copiam adsumere, quam extra imprægnationis tempora. Multo minus dicto Autori subscribimus, dum retur, foetum in utero parum, vel nihil prorsus urinæ secernere, sed renes matris duplici eo tempore munere perfungi,

imprimisque id agere, ut necessitati utriusque corporis, foetus videlicet & matris, eorum actio respondeat. Hanc enim assertionem jam dudum celeberrimus BERGERVS *Physiolog. Med. L. 1. c. 13. p. 207.* ex hac potissimum ratione maxime reddidit dubiam, quod nihil à foetu ad matrem revehi possit, vel hoc experimento teste, quod liquor siphone per arterias umbilicales injectus per venam umbilicalem redeat, modo placenta fuerit illæsa; ad quod experimentum non minus provocare videmus Cl. FRIDER. HOFFMANNVM *Medic. Rational. Systemat. Tom. I. p. 346.*

§. XI. Satis dictum esto de stimulo ad frequentius emittendam urinam in gravidis, tanquam signo conceptionis non pridem factæ una cum aliis merito sociando. Invitat nos nunc aliud signum postessentiale graviditatis ad sui considerationem, & pensitationem intimiorem. Est hoc urina coloris spicei vel straminei, aut citrei remissioris paulo, cum sedimento, vel potius enæoremate seu suspensione, non nihil ad fundum declinante, instar lanæ tenuiter carptæ urinæ innatante. Deterrire equidem à proponendo signo hocce facile nos potuisset monitum Cl. in arte salutari Virorum, FORESTI, CORDI, MINDERERI, SCHEFFERI, BERGERI, aliorumque, quod scilicet vir gravis atque honestus se non facile urinarum inspectioni dedere debeat, præsertim, cum alia signa non desint, è quibus morbi, corporisque indolem rectius cognoscamus. Verum enim vero licet prudenti huic monito omnino subscribendum esse putemus: attamen & nobis largiendum esse arbitramur, quod ad dignoscendam oeconomiam animalis rationem maxime dubiam omnibus signis, collective sumptis, opus sit; idque in statu graviditatis, sæpe admodum dubio, quam maxime quoque locum habeat. Plusculis nempe, ut in viam, à qua discessimus, revertamur,
ab-

abhinc annis Practicus quidam veteranus, ac celeberrimus, signum hoc nobiscum communicavit, simul fidem suam interponens, phænomenon hoc se rarissime in dignoscenda graviditate fefellisse. Adhibuimus igitur subsequentibus annis id ipsum in casibus dubiis, ita tamen, ut ad reliqua quoque signa, & ex his maxime ad mensium emanationem, abdominisque augmentum attenderimus, & semper prædictio respondit eventui. Cum enim urina descripta non admodum multum à facie urinæ naturalis abeat, sed saltem innuat, factam esse leviolem quandam mutationem circa coctionem primam, s. chylicationem, quin & secundam, s. sangvificationem; ideo, reliquis graviditatis signis præsentibus, eo magis eandem indicat, & statum cachecticum, vel obstructionem mensium morbosam, adesse negat.

§. XII. Nullo modo vero signum hocce ab urina desumptum pro novo quodam invento venditamus, paulo post enim ac idem nobis tanquam egregium commendatum erat, legimus in *illustris nostri W E D E L I I* supra laudata dissertatione p. 19, quod ipsum jam suo tempore EBNSINA s. AVINCENNA commemoraverit, atque ex eodem JO. GVINTHERVS ANDERNACVS de *med. veter. & nova comment. 1. dialog. 1. p. 514.* sequentibus verbis descripserit: Urinæ farinæ similes in ægrotis longæ valetudinis adversæ indicia; in gravidis tamen etiam sanis observari possunt. Quippe nonnulla tenui farinæ aut amylo similia in illarum urinis, etiam cum bene valent, innatant, in quibus, dum quietæ servantur, crassius aliquid lanæ tenuiter carptæ instar in imo subsidet, vel in medio hæret, quod conceptum indicat, ut sæpe sumus experti.

§. XIII. Ex hætenus dictis prompte fluit, urinæ considerationem in gravidis non penitus negligendam, sed reli-

quis quoque lignis merito sociandam esse, in casibus maxime dubiis, & ubi mensium obstructio morbifica loco veræ imprægnationis à foeminis, illicita venere usis, prætenditur, vel conceptio alias ignoratur. Solet enim urina in foemellis, per aliquot mensium spatium obstructionem præternaturalem tributi lunaris passis, vel aquosior, vel teste LOMMIO *Observ. L. 2. p. 274.* crassa, turbida, rubicunda, & interdum nigricans observari. Præterea sibi de graviditate ex impuro coitu contracta male consciæ sæpiuscule medico liquorem obscœnum exposcenti eundem exhibere denegant, & hoc ipso se magis suspectas reddunt, vel intuenti, & de graviditate pronuncianti corporis sui statum cum nimis sero pudore profitentur.

§. XIV. A phænomenis, circa urinæ excretionem, ejusdemque statum in gravidis occurrentibus, & tanquam signis conceptionis factæ simul adhibendis, meditationes nostras ad placentam uterinam dirigimus. Pro certo vero ponimus incertam esse hujus substantiæ sedem, eandemque non solum matricis fundo lateribusque, sed & cervici, uterique ostio adnasci, præsertim, postquam id ipsum Cl. Anatomici, *Magnificus* scil. *nostræ* SLEVOGTIVS in *programme de incerta placenta uterina sede, dissertationi Inaugurali de Tenesimo D. D. Pillingii annexo, atque Excell. SCHACHERVS in dissertatione Inaugurali Dn. Seyleri de placentæ uterina morbis, observationibus omni exceptione majoribus clarissime evicere; idem non minus confirmantibus Excellentissimis Viris WELSCHIO atque HEISTERO, in tabulis & compendiis suis Anatomicis.*

§. XV. Observationes, quas diversa hujus substantiæ sedes nobis in praxi suppeditavit, sunt sequentes: Duabus honestissimis foeminis diversis temporibus à consiliis medicis fuimus,

mus, quarum una sexies, altera vero bis uterum gesserat. Utraque quidem mihi exponebat mensium emanfionem, sed querebatur simul de tumore, & aliquo gravativo dolore, versus regionem pubis magis vergente, qui tamen tumor sibi olim gravidis altiori loco confederit: verba earum erant: *Es wäre ihnen nicht also / als da sie ehedessen schwanger gewesen; Es läge ihnen so in der Schooß / und auf denen Beinen / würde ihnen so sauer / wenn sie eine Treppe steigen sollten.* Quid? quod utraque ob disparia à pristina graviditate signa se non gravidam esse pronuntiabat, sed symptomata dicta, vel à mensium obstructione morbifica, vel molæ præsentia dependere autumabat, atque medicamentis menses molamve expellentia, corpusque ab imminente graviore morbo vindicantia querula expetebat. Ast perpendentes utrasque juvenes, non male coloratas, atque mariti vegeti consuetudine uti, vere gravidas easdem esse judicavimus, & tempus gestationis medium patienter expectandum svasimus, quod omne dubium certissime esset dirempturum; in spem & solatium interea temporis mixturam ex Essentiis lign. aloes, cinnamomi, & cort. citr. essentificatis compositam, vel pulverem absorbentem & simul aromaticum exhibentes. Medio mensis quinti ambæ motum foetus legitimum primum sentientes lætabundæ nobis exponunt, eventum prædictioni nostræ respondere, offertque junior urinam, quæ talis erat, qualem supra sanis gravidis competere innuimus. Completo gestationis tempore altera, quæ jam sexies enixa erat, obefior, ac carnosior, foetum excludere sustinet, sed deficiunt dolores necessarii. Quare positu foetus legitime se habente, ostioque uteri jam sufficienter hiscente, hora ante meridiem decima, vel undecima, vocati offerimus pulveris pro partu promovendo duo præbia, duarum horarum intervallo adsumen-

da : unde tandem his assumtis hora quarta pomeridiana puellus carnosus ac vegetus prodiit ; ast avulsio placentæ obstetrici nostræ, hic loci veteranæ & exercitatissimæ, multum facessebat negotii : parti supernæ enim cervicis uteri firmiter ista adhærebat, quare manui obstetricis supra os pubis ad placentam accessus erat perdifficilis. Atque plane eandem je-
coris hujus uterini sedem in altera observavimus ipsi, quippe quod, laboribus obstetricis non ex voto fluentibus, separare coge-
bamur.

§. XVI. Circa indigitatum autem placentæ uterinæ locum eo nostræ vergunt meditationes : annon idem disparium à pristina graviditate signorum circa initium gestationis possit non raro esse causa. Dum enim placenta uterina cervici uteri, ceu loco decliviori, adnascitur, necessario primis mensibus foetus ipse ob funiculi umbilicalis brevitatem eo inclinat, & per consequens tumor, & aliquale pondus magis circa regionem pubis eminent, observaturque, quam isto fuit graviditatis tempore, quo hepar uterinum altio-
rem in matrice occupavit locum. Admonent vero simul ejusmodi observationes medicum, ut cautissime in dignoscendis gravidis, primis potissimum mensibus, procedat, cum sæpe foeminæ ipsæ nesciant, quid intra viscera sua agatur, & per consequens facile, tum semet ipsas, tum medicos, decipere possint.

§. XVII. Considerationem diversæ placentæ uterinæ sedis, disparitatem quandoque signorum graviditatis à pristina foeminarum foetarum conditione parientis, excipiat ruspacio corporis istius glandulosi lutei in ovario, ad secessum ovuli imprægnati ex eodem multum facientis, quod REGNERVS DE GRAAF. *Tract. de organ. genital. mulier. c. 14. p. m. 245.* MALPIGHIVS in *epistol. Dissertatione de utero ad Cl. Sponium* ; RVYSCHIVS in *observ. de ovo in utero humano reperto,*
inserta

inserta Tom. I. Bibliotheca Anatomica. BOHNIVS *Circ. Anatom. Progymn. I.* BERGERVS *Physiolog. Med. p. 475.* & JO. MAVRITIVS HOFFMANNVS *Idea machine humane sect. 12. p. 91. seqq.* diversa licet quodammodo ratione, describunt.

§. XIIX. De hujus corporis, vulgo glandulosi dicti, generatione inter celeberrimos Physiologos atque Anatomicos diversa alitur sententia. Cl. enim BOHNIVS atque *Excell.* JO. MAVRITIVS HOFFMANNVS, secuti GRAAFIVM, statuunt, id ipsum non nisi prævio coitu foecundo generari: Cl. vero BERGERVS, MALPIGHII vestigia premens, negat, quod corpus hocce congressus demum foecundi, sive conceptionis effectus sit, sed adstruit potius, ipsum hanc longe antecedere, ovique veri generationi non præesse modo, verum etiam idem fovere, atque excludere. Uniuscujusque opinionis fautores eandem observationibus & rationibus firmare student. Cl. BERGERVS quippe *l. c. p. 458. seqq.* potissimum verbis hypotheseos suæ defensionem suscipit: De quo quidem corpore illud vero simillimum videtur, idem è prædictis illis vesiculis, quæ quovis tempore in ovarii luxuriant, & pro ovulis vulgo habentur, excitari, initioque exiguum admodum esse, tractu vero temporis in eam excrescere molem, ut totam fere ovarii capacitatem plerumque occupet: Nam illarum vesicularum non unam tantum, & alteram, cui lutea isthæc & glandulosa substantia graminis instar adnascebatur, in vitulis junioribus laudatus modo Italus observavit, sed etiam in vaccis, atque animalibus aliis, quorum tamen foetus tam multiplex non est, nec raro in uno eodemque ovario plura lutea hæc corpora inæqualis magnitudinis annotavit, quamvis nulla superfoetationis adfuerit suspicio, qui vid. pl. Quod vero Cl. BOHNIVM spectat, hic intrepide

pide *l. c. p. m. 19.* perspicuis verbis adserit : se nunquam in diversis, tam humanis, quam brutorum subjectis, nisi a coitu excrescentiam illam observasse : paucisque verbis interjectis inquit : pariter quos uteros vaccinos, & ovillos hujus rei experiundæ causa hætenus lustravi, horum non imprægnatorum testiculos glomis hisce glandulosis vacuos, foetorum vero illius tantum lateris, cujus cornu foetum gerebat, testiculum uno, effœto tamen (i. e. ovulo orbo) instructum vidi, hinc ordinarie non nisi coitus proliferi productam substantiam hanc auguror. Cum his BOHNII observationibus exacte respondent à celeberrimo HOFFMANNO *l. c.* annotatæ, qui ibidem simul injicit mentionem sectionis fœminæ, per quatuor mensium spatium foetum in utero gerentis, ex submersione desperata in Pegnesum flumen vita defunctæ, in cujus ovario sinistro ejusmodi invenit excrescentiam glandulosam pressulæ rotunditatis, leviter adhærescentem, ita, ut sponte separari potuerit.

§. XIX. Ea vero, quæ circa dictum corpus glandulosum in dissectione uterorum gravidorum observare nobis integrum fuit, sunt sequentia, atque cum observationibus Graafianis, Bohnianis, ac Hoffmannianis maximam partem conveniunt. In ovariis quippe vaccarum foetarum semper in isto latere excrescentiam glandulosam luteam invenimus, in cujus lateris cornu foetus vaccinus hæsit, eamque eo majorem, quo minor fuit foetus, eo minorem vero, quo hic major extitit, ac partui proximior. Demonstravimus etiam aliquot vicibus solertissimis nostris auditoribus cicatricem in summitate dictæ substantiæ protuberantem ; soluta vero cicatrice, stylo, globulo instructo, in cavitatem quandam, pisi majusculi capacem, penetravimus. In canum vero fœmellarum gravidarum ovariis numerus glandulorum corporum re-

spondit

spondit numero in cornibus degentium foetuum. Nec minus in trium puerperarum, in ipso partu extinctarum, foetusque mortuos intra matricem adhuc continentium, ovariis, (cujus unius corpus, id ipsum nonnihil balsamandi fine, reliquarum vero duarum cadavera, curiositatis chirurgicæ & medicæ ergo, incidere nobis concessum fuit) substantiam quandam spongiosam luteam rotundam, ad instar papillæ cum cicatricula protuberantem, clarissime observavimus, & circa unius sectionem pluribus adstantibus medicinæ alumniis conspiciendam præbuimus. Quid? quod in ovario infanticidæ cujusdam, quod è donatione *Magnifici & venerandi nostri SLEVOGTII* tredecim abhinc annis possidemus, cuius curioso spectatori substantiam hancce, cerasi majoris magnitudinem habentem, demonstrare valemus. Porro annotavimus in vaccarum ovariis, tam istis, quæ turgida erant hæctenus descripto corpore glanduloso, quam eodem vacuis, portiunculas quasdam parvas subluteas, notabiliter duriusculas, quas pro contabescentibus, & contractis corporibus glandulosis, olim veris, habuimus, & adhuc habemus. Ad quam sententiam nostram confirmandam maxime faciunt verba *Cl. BERGERI l. c. p. 457.* Namque hic notari refert, eam glandulam ita paulatim contrahi, & minui, ut tandem vix aliquod ejusdem vestigium extet. Id quod in aliis citius, in aliis tardius contingere à ratione minus abhorret. Hucusque Bergerus. Naturæ enim in more positum est, partibus, officio suo circa hominem nascendum functis, sensim sensimque nutrimentum debitum subtrahere, unde necessario imminui, & contabescere easdem oportet, exemplo manifestorum venæ & arteriarum umbilicalium canalium, brevisque tubi arteriosi, inter arteriam pulmonalem & aortam descendentem siti, quippe quas partes in ligamenta, satis tenuia & impervia, successu temporis abire conspiciamus.

§. XX. De origine & usu itaque excrescentiæ glandulosæ intimatæ summa sententiæ nostræ, utpote phænomenis circa eandem [consurgentibus conformior, est: quod equidem prima stamina, tanquam radices ipsius, in ovariis lateant, atque ovulo, ad maturitatem usque, per connexa vascula nutrimentum conveniens adducant, non prius tamen oculis, non armatis, eadem sub specie corporis rotundiusculi ac lutei ordinarie compareant, nisi à prævio coïtu, quippe post quem à virtute expansiva seminis generosi masculi minima hujus substantiæ moles admodum late & expedite, paucorum dierum spatio, ad maxime notabilem magnitudinem succrescit, papilla sua magis magisque extuberat, ambientemque ovarii tunicam paulatim emollit atque perfodit, retractaque sensim fibrarum motricium contractione sinum suum aperit, & per hujus ovarii hiatum ovulum, propter magnitudinem & maturitatem ad egressum ex ovario paratum (adjuvante, per dicta, niduli hujus fibrosi constrictione, qua contracta avulsaque vascula, à quibus illud pender, sine ullius effusione succi idem dimittunt) in oviductum expellit & protrudit, uti quidem nobiscum ita arbitrantur Cl. GRAAFIUS, atque ex parte *celeberrimus* BERGERVS. A cujus posterioris tamen sententia in eo recedere nobis liceat, dum, p. 465. præsertim, judicat: ovulum summe maturum à solo actu venereo, & inde dependente ovarii & glandulosæ excrescentiæ fibrarum motricium contractione, applicationeque tubarum Fallopianarum ad ovaria è sede sua expelli, citra concursum ordinarium & actualem seminis masculi ad ovulum, in ovario contentum, adeoque ex mente ipsius, conceptionem, s. ovulorum foecundationem, non in ovariis fieri, sed potius in utero, postquam ovula ope oestri venerei eo fuerint delata, & semine masculo undique ibidem conspersa. Ex hocce vero phænomeno

meno hypothesin suam probabilem reddere gestit Cl. Autor; quod per sola veneris ludibria, & fricatricum salacitatem ova interdum subventanea citra prævium coitum fuerint excreta, idem annotantibus KERCKRINGIO, atque BOHNIO. At sicuti talem ovuli non foecundari deportationem in uterum raro, & certis saltem sub circumstantiis, evenire, ipsius adsertores ultro fatentur: ita *Excell. BOHNIVS Circ. Anat. Progymn. I.* hujus phænomeni hanc subesse rationem suspicatur, quod aliquando in ejusmodi subjectis lascivis sibi relictis similis substantia lutea generetur, quatenus vel a stimulis venereis intrinsecis, vel extraordinario sanguinis & succi genitalis orgasmo exagitationem intestinam & secessionem portionis lymphaticæ unius alteriusve ovuli è mente sua, imprægnationis motui similem, contingere, non impossibile sit. Quam maxime vero hypothesi Bergerianæ contrariari videntur istæ aliquot Cl. Anatomicorum observationes, quibus constat, quod post coitum demum ordinarie alteratio quædam in ovario, & in eodem ovulum, corpore glanduloso luteo opaco circumdatum, ab iisdem fuerint conspecta. Per consequens semen masculinum opus habuit ad ovarium ipsum penetrare, ut mutationem istam ibidem perficere potuerit. Observatio egregia est, quam hoc de negotio habet solertissimus organorum genitalium muliebrium ruspator REGNERVS DE GRAAF. l. c. in Tract. de hac materia, quæ ut integra huc transcribatur, mereri videtur: Brevi namque post coitum ovarorum tunicas, quæ antea diaphanæ erant, opacas devenire conspiciamus, multisque sanguineis vasis adornari, & postero die post opacitatem illam conspectam inter dictas ejus tunicas glandulosam quandam materiam, totum ovum involventem, globulique figuram repræsentantem, intueberis, quæ sensim accrescens ovum undique comprimendo, illud tandem

per foramen, quod in cuniculis tertio post coitum die, in ovibus, vaccis, aliisque majoribus animalibus, quæ diutius uterum gerunt, tardius evenit.

§. XXI. Dum igitur hucusque prolixè satis in exponendis & recensendis observationibus & meditationibus de corpore luteo ovarii, tum aliorum Autorum, tum nostris, occupati fuimus, manu quasi ducimur ad considerationem novi ovarii quibusdam dicti, h. e. racemi, vel congeriei vesicularum quam plurimarum, intra uterum & circa internum ejus orificium, ac cervicem, juxta aliquot Autorum observationes, reperibilem. Abiere sane Physiologi & Anatomici circa usum hisce corpusculis globosis adsignandum in diversas opiniones, dum alii, ut *BARLIVS dans les Nouvelles decouvertes*; *ORTLOBIVS, in Historia Part. & oeconom. animal. Dissert. XXXIV*; & *LITRIVS dans les Memoires de l'Academie Royale des sciences, teste MORGAGNO in Adversar. Anatom. p. 37.* eadem pro hydatidibus habuere; alii, è quorum numero ipse *MORGAGNVS* atque *VERHEYENVS*, pro glandulis liquidum glutinosum secernentibus, quod in gravidis uteri orificium claudit; alii, ut *Cl. HEINRICI, in Dissert. de vesiculis seminalibus mulierum*, pro conceptaculis, vesicularum seminalium virilium vicem sustinentibus, sive semen proliferum profundentibus; alii vero, sicuti jam innuimus, pro veris novisque ovulis mulierum, in quibus ipse foetus formaretur. Posterioris hypotheseos inventor est *Cl. Professor atque Anatomicus Lipsiensis D. NABOTH*, qui in *dissertatione de sterilitate mulierum Ao. 1707. Lipsiæ ventilata* eandem è situ commodiori harum vesicularum ad foecundationem præ ovulis in testibus muliebribus reperiendis, conformatione earundem plane singulari, ac determinata, dum placentam, tunicas, humores, embryonem atque vasa, ceu partes ad foetus

tus productionem necessarias, continerent; ordinariorum ovariorum statu scirrroso, & defectu ovulorum in iisdem, obstructione tubarum Fallopiarum, conceptione tamen nihilominus facta, adstruere summopere annisus est. Ast licet ad cuncta hæcce argumenta jam tum à non paucis pererudite responsum fuisse doceat, ut putamus, *Epistola Problematica Excell. Professoris Lipsiensis MICHAELIS ERNESTI ET TMVLLERI, de ovario novo ad Cl. RVYSCHIVM perscripta, hujusque ad eandem responsio, Adversariis Anatomico-Medico Chirurgicis, Anno 1717. editis, inserta no. 2. p. 4. de ovario, ut habetur novo & de hydatidibus plura.* Nihilominus tamen dantur adhuc Cl. quidam Medici, qui ovaria duo nota, & hucusque à celeberrimis Anatomicis unanimi consensu pro veris habita, in dubium vocare, & ovarium Nabothianum vel ipsis ceu commodius substituere, vel tamen ovulorum in ovario antiquo defectum idem abundantissime restituere & supplere sustinent. Sententiæ hujus Patronum egregium reperimus *celeberrimum Consiliarium Regium & Professore DN. FRIDERICVM HOFFMANNVM in Medicina Rationalis systematica Tom. I. p. 341.* quippe qui sequentem in modum differit §. 14. : Vulgo habitum ovarium an vera ovula generationi apta contineat, nondum res satis plana ac perspicua est. Et §. 15. Verisimilioreorum apparet sententia, qui ovarium intra uterum & circa internum ejus orificium ac cervicem constituunt, ubi utique racemus innumerorum ovulorum semper conspicitur, quæ & facilius semine virili foecundari & à compedibus liberari possunt. Rationes vero dubitandi ipsi sequentes sunt : 1) Quod ratio neutiquam adsequi possit, quomodo vesiculæ ovariorum foecundatæ à firmo membranarum involucri, cui altius insident, sine insigni læsione & erosione ovarii & extravasatione humorum se liberare possint. 2.) Nullo modo concipi pos-

fit, quomodo ovulum ab ovario liberatum per canales Fallo-
pianos, ultra duos transversos digitos ab ovario distantes re-
cipi, & ad uterum provolvi queat. 3.) Non intelligatur,
quomodo genitura virilis per solidum uteri corpus, vel tubas
clausas commode ad ovarium & ovulum salva sua textura per-
venire, idque fœcundare possit.

§. XXII. Liceat igitur nobis Excellentissimo huic, aliisque
ovariorum novi fautoribus & adsertoribus ad tria hæcce argumen-
ta responsiones quasdam, non lascivo contradicendi studio,
quippe à quo alienissimi sumus, sed veritatis indagandæ amo-
re modeste proponere 1.) enim ovariorum s. testium mulie-
brium involucrum membranaceum tam firmum non est, quin
idem ab ipsius ovuli maturi & corporis glandulosi lutei mo-
le ita attenuetur, ac expandatur, ut tandem in summitate sen-
sim perfodiatur, ovulumque placide & sine effusione humo-
rum dimittat. Quorsum apprime præter supra à nobis expo-
sita, & sedem ovuli exclusi in ovariiis perspicue adserentia, fa-
ciunt verba REGNERI DE GRAAF l. c. Foramen, inquit,
per quod ovum expelli diximus, ante glandulosam globulo-
rum substantiam frustra quæsieris, quandoquidem immediate
ante & post ovi expulsionem tantum appareat, cum aliqua
prominentia, quam præ similitudine non inepte papillam no-
minaveris, cujus foramen pro animalis magnitudine variat;
stylum in vaccis, in cuniculis vero tantummodo setam ad-
mittit. Neque 2.) magna difficultate premi arbitramur ad-
sertionem, qua tubas Fallopianas, licet nonnihil ab ovariiis
distantes, ovulum ad secessum è sede sua pronissimum excipe-
re & ad uterum devolvere perhibetur: modo cogitemus à
Cl. RVYSCHIO in muliere, brevi ab imprægnatione inter-
empta, partem tubæ proboscidis instar ad ovarium tortam, ut
maturum exciperet ovulum, visam & demonstratam esse in
obs.

obs. de ovo in utero humano reperto. Quemadmodum enim membrum virile extra veneris appetitum pendulum, flaccidum atque breve observatur, tempore vero oestri venerei elongatur, attollitur, ac rigidum fit: ita non videmus, quid obftet, quo minus tubæ Fallopiianæ, (licet diversissima sit horum canalium & penis structura) laxius cum ligamentis uteri latis cohærentes, elongentur quasi, proximius ad ovaria accedant, eadem ornamentis suis foliaceis amplectantur, & hiantibus veluti faucibus ovula matura, si quædam adsint, excipiant, motuque peristaltico fibrarum suarum in uteri cavum deinceps sensim devolvant? Omnem denique circa generationem animalis ex ovo, in testibus muliebribus reperiundo, dubitandi occasionem præcidere videtur elegans illud NVCKII experimentum, à Bergero l. c. p. 457. quoque commemoratum, quo ille in cane foemina tertio post congressum die extraxit per vulnus, abdomini inflicto, sinistri lateris cornu, cujus ovarium jam duobus ovulis majusculis notabiliter conspicuum vidit, idemque deinde inter ovarium & vaginam, medio loco ligatura arciori constrictum, reposuit, ac vulnus obligatum intra octiduum ad cicatricem perduxit. Vigesimo primo vero ab injecta ligatura die canem secuit, & cornu sinistri partem, ligaturam inter & ovarium, duplici obfessam foetu, alteram vero partem, ligaturam inter & vaginam, vacuum & inanem deprehendit. Deniq; non opus est, ut de viis, per quas semen masculinum ad ovarium & ovula, salva sua textura, pervenire, hæcque foecundare possit, multum laboremus. Sunt enim foramina tubarum Fallopiianarum circa ingressum in uteri cavum in statu naturali minus occlusa, adeo, ut tam circa uteros humanos, brutorumque cornua, statum in corporum horum cavitates injectum, ex iisdem in tubas, & ex his vice versa in uterum, vel cornua, prompte aliquoties penetrasse

trasse observaverimus, id quod etiam feliciter successit, quando vel hydrargyrum, vel Tincturam croci sandalivæ in tubas Fallopianas injecimus. Præterea è singulari in observando dexteritate & industria Cl. FRIDERICI RVYSCHII patet, quod semen masculum, quoad substantiam crassam quoque, in coitu non solum in uteri cavum, sed & in tubas Fallopianas usque penetret, & evibretur. Curiosissimus enim hic Anatomicus in *Adversariis Anatomico-Medico-Chirurgicis* l. c. mentionem injicit dissectionis uteri & tubarum Fallopiarum meretricis pulcherrimæ, ab amasio suo statim post coitum interfectæ, quarum partium cava semine masculo, albo, bono & naturali referta deprehendit. Idemque spectaculum olim se vidisse perhibet in cadavere mulieris cum adultero deprehensæ in adulterio, statimque à marito deprehensore interfectæ, ut descripsit in *Thesauro Anatomico*, quem ordine Vto evulgavit. Cum igitur semini, à viro ætate viribusque valente evibrato, usque in ipsas tubas promptus accessus pateat, nihil morabitur spiritum ejusdem generosum, s. auram vitalem subtilissimam, quin expedito itinere usque ad ipsa ovaria migret, ibidemque ovulum maturum foecundet, sive motum vitalem in eodem excitet.

§. XXIII. Ex argumentis, quæ Cl. NABOTH pro confirmando ovario novo in medium producit, maxime stringens esse videtur, quod conceperint atque pepererint foeminae quædam, quarum tamen testes omnibus ovulis, s. vesiculis, fuerint destituti, & loco horum corpusculorum vel pingvedine, pilis, aut duritie scirrhusa obsessi: nec non quod orificia tubarum fuerint clausa reperta. Equidem de dexteritate observandi optimi viri dubitare nefas ducimus, sed merito observationibus fidem habemus. Hoc tamen momentum pensitandum proponimus: an non in ovario, vel dextro, vel fini-

sinistro, eo tempore, quo facta fuit conceptio, unum alterumve sanum, & ad foecundandum aptum ovulum hæserit, ac status præternaturalis descriptus, tum respectu ovariorum, tum utriusque tubæ, integro graviditatis spatio vel oriri, vel potius augeri potuerit. Ut adeo minime inferri queat, quod foetus in ista puerpera, cujus mentionem fecit DN. D. NABOTH, in nullo ovulo, quod hæserit intra testes muliebres, fuerit formatus. Ast jam dudum Anno 1708. D. D. CHRISTIANVS FRIDERICVS BVTTIGER in dissertatione Lipsiæ ventilata, in qua foetum non ante conceptionem, sed post eandem, formari docet, argumentum hocce publice discussit, ut adeo plura addere prorsus supervacaneum censeamus.

§. XXIV. Celeberrimorum igitur Anatomicorum observationibus, his de vesiculis annotatis, probe trutinatis eadem vel cum BARLIO, ORTLOBIO, LITRIO atque RVYSCHIO pro hydatidibus habemus; vel cum VERHEYENO, MORGAGNO atque HEISTERO in *Compend. Anat. p. 59.* pro glandulis vel vesiculis, humorem glutinosum secernentibus, qui in gravidis uteri orificium claudit; puta, postquam horum corpusculorum globosorum præsentia in omnibus subjectis sanis, justæque ætatis, erit demonstrata. Cl. RVYSCHIVS, qui se in exponenda partium genitalium structura non parum exercuit, *l. c. obs. 2. p. 4.* hac de re ita pronunciat: Profiteor igitur palam, plurima me cadavera foeminina, eaque variæ valde ætatis, incidisse atque intento perlustravisse animo & oculo, neque tamen unquam in cavo uteri vidisse aliquid, quod ulla omnino specie ovarium verum referret. Quare tandem p. 7. concludit, ovarium fictum Nabothianum fuisse modo hydatidum inter rugas valvulosas os uteri internum obsidentes natarum congeriem.

Hydatides autem hujusmodi, ut in omni morbo lento partes quascunque occupant, ita viscera præprimis infestare interiora observantur frequentissime. Ego vero censeo, hydatides esse extremitates vasorum sangviferorum, quæ priorem suam mutaverunt naturam, atque in vitiosam degenerarunt fabricam.

§. XXV. Ovarii Nabothiani considerationem excipiat breve tunicarum, foetum humanum in utero ambientium, atque funiculi umbilicalis examen. Satis enim notum est, quanta ad hunc usque diem inter Cl. Anatomicos atque Physiologos de hisce partibus vigeat disceptatio, dum scilicet plurimi duabus saltem tunicis, chorio nempe atque amnio, foetum humanum in ergastulo uterino includi, nullam vero allantoidem, inter tunicas dictas mediam, atque tertiam constituentem, nec urachum pervium in funiculo umbilicali adesse perhibent. Alii contra, è quorum numero quam maxime NEEDHAM, GRAAFIUS, BIDLOO, MVNNICKS aliique, contrarium adserunt, partim, ut putant, experientia propria, partim hoc potissimum argumento permoti, quod inter tunicas foetuum quorundam brutorum, ut vaccarum & ovium cumprimis, tunica quædam farcimini maximo similis, & ideo Græce *αλλαντοειδής* nominata, sit reperibilis, quæ urinam foetus per urachum è vesica excipiat, & ad partus usque tempus asservet, cumque per consequens foetui humano eadem urinam excernendi incumbat necessitas, quæ brutorum foetibus, adesse etiam debeat tunica urinaria, ceu liquoris obscœni receptaculum, cum uracho pervio. Antequam autem mentem nostram clarius de hujus tunicæ existentia vel adserenda vel neganda exponamus, expromamus prius observationes quasdam circa dictas partes institutas. Perbene nempe recordatur D. Præses, quod hic loci in Theatro A-

anatomico diversis temporibus duo cadavera foeminina gravida, fato interempta, à *Magnifico Anatomia Professore* DN. D. SLEVOGTIO fuerint incisa, & se t. t. medicinæ alumno, aliisque quamplurimis commilitonibus præsentibus à Cl. Professore, inter examen tunicarum foetus, maxima cum sedulitate tunicæ urinariæ facta fuerit inquisitio, ast nulla talis tunica inter chorion & amnion media, foetum undiquaque cingens, urinamque asservans, inveniri & demonstrari potuit. Absolute etiam necessarium esset, si inter secundinas humanas daretur allantois, ut urachus in funiculo umbilicali humano pervius esset, ceu qui urinam illuc è vesica foetus deportare deberet. Verum duplici experientia propria compertum habemus, eum in uno subjecto statim circa fundum vesicæ penitus occlusum, in altero vero vix ad digiti minoris transversæ latitudinem à vesicæ fundo pervium fuisse. Posterius phænomenon licuit nobis observare d. 6. Novembris anni 1718. proxime elapsi in foetu masculo, è sartoris uxore laboriosissima operatione instrumentis extracto; prius vero ante aliquot annos in dissectione uxoris civis cujusdam hic loci in partu extinctæ, ejusdemque foetus, in utero non minus vita privati; simul aliquot medicinæ studiosis spectaculum spectantibus. Injecimus quippe tubulo flatum in cavum vesicæ apertum, sphinctere interea accurate compresso, unde vesica quidem egregie fuit distenta, nullo modo vero urachus: cum tamen in vesicas foetuum vaccinorum propulsus flatus promptissime ex iisdem in urachos, & ex his in sibi continuatas allantoides progrediatur, easdemque propulsione continuata mirum quantum expandat. Nihilominus tamen nondum, nisi pluribus factis experimentis, tunicæ urinariæ & urachi pervii circa foetum humanum existentiam prorsus negamus; nec audemus cum RIOLANO, VESLINGIO, RVYSCHIO, aliis-

que pro infallibili adserere, quod urina in foetus vesica usque ad partus tempus asservetur. Licet enim eandem in duobus dictis subjectis, respectu proportionis in adultorum corporibus, utique majorem cum dictis Autoribus deprehenderimus, attamen urinæ copia ibidem collecta non adeo insignis fuit, ut inde concludere potuerimus, fuisse ipsius integram molem, formationis tempore congestam. Neque arridet nobis cum DRELINCVRTIO statuere, quod foetus in amnii liquorem mingat, eumque deinde ore resorbeat. Sed potius hæc talia cum *meritissimo & ornatissimo Professore* BERGERO in medio rerum nondum satis exploratarum relinquimus. Quam maximam vero pensitationem circa hoc negotium meretur perelegans observatio *Excell. SLEVOGTII*, qua constat, in puero bimo & in parturiente urinam ex umbilico profiliisse à se visam, cum in illo per urethram à calculo obstructam, & in hac à foetu in utero compressam, exitum non invenerit, sicuti recenset *Dissertatione de incontinentia urinæ* p. 7. Præbet hæc observatio occasionem cogitandi de uracho olim pervio, & quod natura sui conservationi intenta viam pristinam repetierit. Sed reservabimus tunicarum foetum ambientium, & ex his maxime urinariæ, nec non urachi examen ulterius alii, & quidem commodiori, occasione.

§. XXVI. Finem dissertationi nostræ imponat observatio de interni uteri oris, ejusdemque corporis maximam partem in partu prolapsu. Die nempe 31. Octobris anno 1716. vocabamur ad textoris uxorem, triginta annos natam, ut foetum mortuum extraheremus. Accedentibus nobis obstetrix & adstantes mulierculæ attonitæ statim exponebant: Fœminam maximo uteri prolapsu laborare & uterum gravidum magnam partem extra cunnū prominere. (Uteri vero prolapsu jam olim virgo affecta fuit.) Adspicientes summe monstrosam speculaculum, saccū membraneo-carnosum distentum referens, ob-

stu-

stupuimus; foetus situm vero inquirentibus legitimus idem occurrit, capite orificium uteri versus spectante facieque prona; nihilominus obstetrix eidem exitum parare nequivit, cum puerpera constrictione musculorum abdominis parum vel nihil ad foetus expressionem conferre potuerit. Capitis igitur cutim cerebrique involucra inter laxius cohærentia bregmatis ossa non æque difficili negotio solvimus, unde mollis cerebri substantia effluxit, quo facto caput forcipe firmiter apprehendimus, sicque, prout par erat, modice trahendo integer subsequabatur foetus. Inter operandum tum ipsi altera manu, tum obstetrix, uterum prolapsum ejusdemque os retinuimus: idipsum enim tanquam necessarium ratio dictitabat, ne scilicet uterus vel longius extraheretur, vel periculosa ipsius inversio succederet, quippe ad quam eo tempore pronum esse *Excell. pariter Anatomicus atque Chirurgus R V Y S C H I V S, observ. Anatomico-Chirurg. centur. observ. 25. p. 32.* sequentibus verbis docet: In hoc statu foetus adhuc viventis exitum naturæ committendum esse, existimo, & os uteri utraque retinendum. Denato vero foetu totum negotium in eo consistit, ut una manu, quantum possibile est, extrahatur, & altera os retineatur, ne simul cum foetu prolabatur, & invertatur uterus, eo tempore ad inversionem pronus. Addendum vero huic præcepto putamus, quod obstetrix præter uteri retentionem, foetus adhuc viventis quoque egressum digitis & manibus suis omni modo, provide tamen, promovere teneatur, cum tali in casu puerpera parum, vel nihil, cohibitione spiritus ad foetus exclusionem conferre possit, nec tuto quoque debeat. Hoc enim si præstare potuisset nostra, propriis viribus foetum, legitime constitutum, atque minorem paulo, enixa esset. Pereundum tamen puerperæ nostræ tandem fuit, licet uterus post partum convenienter & blande esset repositus: febris enim superveniens ipsam, omnibus præsidiis irritis, die II. Nov. extinxit. Sed hæc jam pro instituto nostro sufficiant. Deo autem T. O. M. immortales agimus gratias pro præstito nobis auxilio.

Du stellst/ Geehrter Freund / der gan-
ken Welt ans Licht/
Was Dein besond'rer Fleiß ihm längst hat
ausersehen/ (verspricht/
Dovon dein Vaterland sich viele Frucht
Ich aber laß es ikt bey diesem Wunsch be-
stehen /

Es segne der Höchste dein stetes Begißen/
Bis daß du erreichest die himlischen Zinnen.

Mit diesen wenigen wollte seine gebührende
Gratulation ablegen Dessen ergebenster

P. J. ELARDI, Golno-Pom.

Mens hominum errorum genetrix rimatur & hæret,
Num *cuncta ex ovo*, sive aliunde sient?

TE natum ex cerebro, JUVENIS PRAECLARE! Minervæ,
Ausibus eximiis asseris Ipse Tvis.

Hicce Præ- Nobilissimo atque Doctissimo Domino Re-
spondenti de edito specimine gratulatur

SERVATIVS SCHAD,
de Mittel Bibrac. Ulm.

CVM dederis specimen doctrinae insignis & artis;
Gratulor & cæptis annuat opto Deus.

Hæcce Prænobilissimo atque Doctissimo Domino
Respondenti gratulab. adjecit

JOAN. THEOPH. BONZIVS,
LL, Cult, Ulma-Svevus.

Quanta

Quanta sit ingenii *Tibi* vis ostendis, *Amice*;
Dum solide inquiris, quæ sit ratio *generandi*
Hinc lætabuntur, qui *Te* genuere parentes
Et merito *Patriæ spes exoptabilis* audis,
Denique Musarum *Mater Salana* decorem
Inde sibi capiet, *talem generasse peritum*
Artis sanandi Gnatum virtute cluentem,
Lætos ergo *Tuis* successus apprecor *ausis*,
Utque *Tuo* cedant mox præmia digna *labori*.

*Paucis hisce clarissimo ac eruditissimo Domino
Respondenti de egregio specimine gratulari, su-
amque amicitiam contestari voluit*

J. V. Hildebrand. v. s. L. C.

Nescit iners laudes quas dicat carmine Musa,
Cum *Tuus* haud una floreat arte vigor.
Abdita mox animo naturæ claustra sagaci
Quæris, & ipsius viscera mira vides.
Mox numeras hominum tristes in corpore nævos,
Quorum *Te* nec fons neve medela latet.
Ruptaque nunc herbæ tellure cacumina tollis,
Et vim *Paeoniam* providus inde capis.

Nunc

Nunc juvat intortis solvisse cadavera vinculis ;
Et sic in minimis Numina Magna vides !
Insolitas rerum causas & stamina poscis,
Nec sine fonte *Tibi* mundus uterque placet.
Hinc quid , quod magno dicas conamine, miror,
Ortus quis nostri fonsque modusque fiet ?
Sic operâ quivis è matre in luminis auras
Miranda factus prodit, agitque diem.
Sed *Tibi* natales similes patet esse Minervæ,
Quæ Jove nata dea est, Pallade *Tuque* fatus.
Quî nunc abjectos posses depromere foetus,
Cum dotes hæ sint, HENNENHOFERE ! *Tibi*.
Plausibus hinc meritis ausus probat, atque sacratas
Mox frondes Nato mittet Hygea suo.
Et dum civiles artem convertis in usus,
Vespillo flebit, tristiaque æra movens.

Sic gratulabundus ominatur

Jacob. Frideric. Baur.

LL. Stud. Ulm.

